

Opinion ta un seccion di **Bon Dia Aruba** specialmente pa brinda oportunidad na lectoran individual pa expone nan opinion. Contenido publica di ningun manera ta refleta opinion di **Bon Dia Aruba** y ta pa responsabilidad exclusivo di e organisacion/individuo cu ta ofrece esaki pa publicacion. **Bon Dia Aruba** ta reserva e derecho di no publica texto ofreci, si esaki segun e medio no ta cuadra cu e normanan di decencia cu nos ta mantene, pa evita contenido cu ta innecesariamente ofensivo. Esaki suheto na evaluacion exclusivo di **Bon Dia Aruba**.

OPINION



Skirbi pa Gregorio Wolff

Panorama Geo-Politica nobo despues di combersacion Trump-Putin

Parti 2

Aki ta sigui e segunda y ultimo parti di e piesa kirbi pa Sr. Gregorio Wolff. E prome parti di e piesa aki a ser publica den e edicion di diasabra 22 di februari 2025.

E impactonan grandi cu e politica di Trump a haci te awor ta forma con a subordena Panama y logra su meta pa dominio di e canal di Panama, causando un problema grandi pa Panama cu China.

Merca kier dicta loke ta concerni e maneho di e canal na Panama na beneficio di Merca. Esaki lo trece consecuencianan, pasobra Merca y Panama a yega na un acuerdo pa mengua o elimina e metemento di China den e maneho di e canal. Esaki consecuentemente ta trece cu Panama lo perde Inversio-
onnan biyonario di China na



Panama.

Parce cu e problemanan cu Colombia, Mexico, Canada y Dinamarca (Greenlandia) ta por lo pronto wanta. Pero e paisnan aki awor ta den un mihor posicion pa defende nan pais.

Ta wordo bisa cu Trump lo ta contento si e logra un 10% di su posicionnan inicialmente tuma. Putin sa di esaki.

Conferencia di Seguridad na Munchen
Desde basta tempo caba ta tuma lugar e CSM (Con-

ferencia di Seguridad Na Munchen). Esun di e aña aki di 14 pa 16 di Februari ta nr. 61. E temanan mas importante ta Ucrania y seguridad na Europa y Geo-Politica.

Un di e CSM-nan mas conoci den su historia ta esun di 1938, den cual paisnan di Europa occidente a duna Hitler Sudetenland cu ta un provincia di Czechoslovakia cu frontera na Alemania. Pero na maart 1939 Alemania-Nazi a invadi Czechoslovakia y ocupa e pais aki.

Na e MSC-2007, Putin a haci su famoso speech y a condena e politica unipolar di Merca y paisnan di NATO, pa NATO rondona Rusia. Putin na 2007 tabata modera den comparacion cu su posicion awe. Ningun lider no kier a tende nada di Rusia na 2007.

CSM-2015, despues cu Mer-

ca na 2014 a financia e golpi di Estado na Ucrania, uzando 5 biyon dollar cu Merca mes a admiti pa financia e Revolucion Maidan pa baha e gobierno di Ucrania cu a wordo eligi democraticamente. Durante e MSC-2015, Merca a nenga e acuerdonan di Minsk, esta ta nenga e derechonan di e Ruso-Parlamentan na Ucrania.

Despues den e MSC-2022, cu Rusia a manda su posicion 17 december 2021, papiando di un seguridad na Europa y sigur pa Rusia y cual a ser rechasa dor di Merca (Pres. Biden).

Esaki tambe tabata e posicion di paisnan di Europa cu nan posicion anti-Rusia. Cada un tabata di opinion cu un politica di anticipacion pa ataca Rusia cu sancionnan pisa pa caba cu Rusia.

No solamente nan tabata contra Rusia pa ataca Ucrania, pero nan tabata desea pa Rusia ataca y pa nan inmediatamente trece nan sancionnan y boycott contra Rusia, tur cu e intencion pa bati Rusia y parti Rusia den 5 cinco republica.

Segun nan si Rusia ataca Ucrania lo sigui cu sancionnan y Rusia su GDP lo baha cu 50%, pueblo Ruso lo lanta contra Putin y su Gobierno. Pa Rusia esaki tabata e motibo primordial pa e atake di Rusia na Ucrania cu su Special Operacion Militar na fin di Februari.

E resto ta historia, cu Rusia ganando e guera y e sancionnan no a haci daño na economia di Rusia, pero si a causa dañonan grandi na Union Europeo y Inglatera.

Potret di AP.

Reinventar Carnaval di Aruba

Y ban back na nos raiz!

Aruba su Carnaval ta den crisis y mester di un intervencion. Cada aña ta mira e paradanan ta menos luhoso, cada grupo tin menos participante, y tin menos carosa. Esaki ta keda bira pio cada aña cu ta pasa. Si no bin cu un intervencion, tin chens cu Carnaval di Aruba lo muri.

Mirando e ultimo paradanan, apenas tin algun carosa, y casi no ta mira niun road piece. E costumes y e carosanan tur a bira menos luhoso, y sobadje tin cada bes menos hende participando, y esnan cu ta participa no ta baila cu mesun zjeito manera antes, loke ta haci cu e paradanan ta bira laaf pa mira.

Ta di compronde cu e situacion economico na Aruba,



impacta pa esun mundial, tin efecto riba nos Carnaval tambe. Tin menos hende cu por afford di gasta placa den Carnaval. E hende cu si tin, tin menos pa gasta, y riba dje tur cos a bira hopi mas caro y e placa no ta yega mesun leu. Companianan cu antes tabata sponsor carosa y grupo, tampoco no tin mesun placa pa sigui haci esaki.

Loke mester haci ta rein-

venta Carnaval, bayendo back na su raiz. Na comienso di Carnaval, ta e clubnan mes tabata organisa e parada y actividadnan. Awo cu tin stichting ta goberna esaki, nos ta mira cu tempo a cambia y esaki no ta dunando e resultado desea. Carnaval di Aruba ta birando pover y ta muestra pover. En bes di duna e inversionnan di Carnaval, por ehemplo di fondo di turismo, na un stichting, mes-



ter duna e placa ey directamente na e gruponan di Carnaval, pa nan usa exclusivamente pa traha carosa, road piece, y costumes bunita di Carnaval, y cubri e gasto di e participantenan, pa asina mas hende por participa. E paradanan lo bira mas grandi y mas luhoso. Sigur cu e gruponan lo por haci un miho uso di e placa. Na final di dia ta e gruponan ta esnan cu ta haci Carnaval. Kico precies ta e necesidad pa tin un stichting? Lo ta miho pa bin cu un raad di Carnaval, cu un representante di cada grupo

aden, y laga nan organisa e carnaval. SMAC como stichting tin su eigen belang, cu no ta mescos cu e gruponan. Pero ta e gruponan, y e hende cu ta join cada aña, ta esnan cu ta biba y haci Carnaval. Si empodera e gruponan di Carnaval, algun di cual ya tin hopi decada ta organisando nan participacion, sigur esey lo engrandece nos Carnaval y trece un poco di e magia back. Mester reforsa e gruponan, pasobra ta nan ta pueblo, y Carnaval ta di pueblo, Carnaval no ta pertenece na un Stichting.

Si no bin cu reforma den Carnaval, ta tristo pa mira, pero Carnaval di Aruba no lo dura hopi tempo mas.

Nota di redaccion: Autor anonimo. Number y adres conoci pa redaccion.